



1. marts 2024

UPA 2024/97

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Nioqqutissanik eqqussuinermi akitsuutit pillugit Inatsisartut inatsisaata allanngortinnissaanut, taamaasilluni tipigissaatit, pinnerfaatit eqqiluisaarnermullu atortut eqqussinermut akitsuutaat (Akitsuutit normuat 090) peerneqarluni, Naalakkersuisut siunnersuummik saqqummiussaqaarnissaannik piumaffigineqassasut Inatsisartut aalajangiiffigisassaattut siunnersuut.

(Inatsisartunut Ilaasortaq Nivi Olsen, Demokraatit)

Tungavilersuut

Akit qaffakkiartuinnavipput. Nioqqutissat tamarmik akitsoriartuinnavipput. Ulluinnaat aningaasaqarnikkut nammassinnaasumik ingerlannissaannik ingerlannissaat ajornarsiartuinnavipput. Demokraatiniillu isumaqarpugut politikkip tungaaniit innuttaasut aningaasaqarnikkut nammassinnaalerujartuinnarnissaat anguniartuaannartariaqaripput pingaartuusoq.

Issittumiinnerput peqqutigalugu amerput paneqqajaasuvoq taamaattumillu tarngutit atornerisigut panernaveersaartinnissaa anguniartariaqartarpoq. Nioqqutissallu taakku soorlu pinnerfaatit tipigissaatillu assigalugit akigitinneqartup qaavasigut 38%-mik akitsuuserneqarsimapput. Tamanna pisiniarfanni atuuppoq taamatuttaarlu nunat allaniit nittartakkatigut nioqqutissanik taakkuninnga pisinermi. Akitsuutimiit aningaasatigut isertinneqartussat 2024-mi ukiunilu tulluuttuni 4 million koruuninik nalilersorneqarsimapput.

Iluamik pilaariarta; akitsuut peertigu nioqqutissanullu eqqaaneqartunut innuttaasut sipaaruteqartitsigit. Tamatta nalunngilarput aningaasanut inatsi 2024 akuerineqarnerani Naalakkersuisut isumaqatigiisummullu atsioqataasimasut innuttaasut kaasarfiiniit 85 million koruuninik aallersimasut. Tamanna Demokraatit peqataaffigiumanikuunngilaat, taamaattumillu neriutigaarput Naalakkersuisut partiillu sinnerisa nioqqutissat ilai innuttaasunut akikinnerulersinnissaanut maannakkut ilaasinnaassasut.

Siunnersuutip aningaasartuutissai 4 million koruunit soorunalimi aningaasalersorneqassapput. Matumani siunnersuutini ammovunga, taamaattorli uanga llanngaassivik imaluunniit akiliisitseriaaseq allaanerusoq eqqunnersagut 30 million koruunit missiliorlugit aanissaat tikkuarusuppara.

Aningaasartuutigineqartussarlu aamma ima appasitsigivoq Aningaasanut inatsimmi missingersuutigineqarsimasuniit, ukiuni aggersuni sinneqartoorujussuuartussami, inissaqartitsisoqarneratigut tiguneqarsinnaassalluni.

Taamatut oqaaseqarlunga Naalakkersuisut Inatsisartunilu partiit sinneri siunnersuutinnut qanoq isumaqarnersut tusassallugu qilanaaraara, neriullunga siammasissumik ilalernerqarumaarpunga.

Pisortanut aningaasatigut allaffissornikkullu kingunissai



Pisortat missingersuutigineqarsimasuniit ukiumut 4 million koruuninik annaasaqassapput. Taassuma avataasigut inatsisissatut siunnersuusionermermi allaffissornikkut aningaasartuuteqartoqassaaq, atorfillip ukiup affaata sulineraniit annertunerunissaanik naatsorsuutigineqarnani (nutserineq, tusarniaaneq aammalu inatsisitigut nalilersuinermit ilanngullugit).

Namminersorlutik inuussutissarsiuteqartunut aningaasatigut allaffissornikkullu kingunissai

Namminersorlutik inuussutissarsiuteqartut tarngutitut, tipigissaatinut aammalu pinneraatinut nioqutissat ullumikkormit 38%-mik akikinnerusumik tuniniagaqarsinnaalissapput.

Innuttaasunut aningaasatigut allaffissornikkullu kingunissai

Innuttaasut ullumikkormit sanilliullugu tarngutitut, tipigissaatinut aammalu pinneraatinut nioqutissanik pisinerminni 38%-mik sipaaruteqartalissapput. Matumani pisiniarfiit maani piusuni imaluunniit nittartakkat nunat allaneersuniit nioqutissat pisiarigaluaaraanniluuniit atuutissalluni.